



KEMENTERIAN PERUMAHAN
DAN KERAJAAN TEMPATAN

SIARAN MEDIA

KPKT MENERAJUI USAHA JIMAT TENAGA, LEBIH 400 PROJEK RENDAH KARBON SIAP TAHUN INI

PUTRAJAYA, 14 April 2026 – Dalam usaha menangani krisis tenaga global, Kementerian Perumahan dan Kerajaan Tempatan (KPKT) melalui Jabatan Kerajaan Tempatan (JKT) menjangkakan lebih 400 projek rendah karbon akan disiapkan menjelang akhir tahun ini, sebagai sebahagian daripada usaha berterusan untuk menangani cabaran krisis tenaga global dan melaksanakan penjimatan tenaga.

Menteri Perumahan dan Kerajaan Tempatan, YB Tuan Nga Kor Ming berkata, selaras dengan komitmen kerajaan MADANI terhadap pembangunan mampan, JKT telah menetapkan sasaran pelaksanaan lebih 200 projek rendah karbon setiap tahun, bermula tahun lalu.

“Pelaksanaan inisiatif ini bukan sahaja menyokong agenda kelestarian negara, malah berupaya mengurangkan kos utiliti Pihak Berkuasa Tempatan (PBT) secara signifikan.

“Setakat Disember lalu, sebanyak 131 projek pemasangan lampu tenaga solar telah dilaksanakan melibatkan 1,992 unit lampu dengan nilai keseluruhan RM15.34 juta,” kata beliau.

Selain itu, sebanyak 136 projek pemasangan lampu LED cekap tenaga, yang kini telah siap sepenuhnya, turut dilaksanakan melibatkan 4,513 unit lampu dengan nilai RM22.39 juta.

KPKT akan terus memperkukuh pelaksanaan inisiatif rendah karbon di seluruh negara dengan memperluas penggunaan teknologi hijau dan mampan menerusi kerjasama strategik bersama PBT, agensi berkaitan serta pihak industri.

“Usaha ini selaras dengan komitmen Kerajaan MADANI bagi mempercepatkan peralihan ke pembangunan rendah karbon serta mengurangkan penggunaan tenaga.” Kata YB KM.

Terdahulu, KPKT turut mengeluarkan siaran media menggesa 156 PBT seluruh negara melaksanakan 6 langkah segera bagi menjimatkan penggunaan tenaga.

“Dibawah pimpinan Perdana Menteri, Datuk Seri Anwar Ibrahim, KPKT sentiasa komited memastikan setiap inisiatif yang dilaksanakan kementerian memberi impak nyata dari segi kecekapan tenaga, penjimatan kos serta kesejahteraan rakyat secara keseluruhan,” tambah beliau.

-TAMAT-